

林文忠公政書

審辦保山哨匪並酌徹官兵摺

奏爲保山滋事匪徒經該處自行縛獻及臣督兵查拏到案者現共三百二十九名訊明情節輕重分別定擬並將首要各犯恭請

王命先行正法地方悉經安靜民情感畏交深各兵酌量留防餘皆凱徹歸伍恭摺具奏仰懇

聖懷事竊臣前將保山七哨懾服軍威獻出匪犯一百三十餘名仍飭各官兵兜拏緣由奏蒙

聖鑒在案臣查該處獻出各犯固不爲不多而其中

尤有首要之人或紳耆畏其強梁或親族徇於情面觀望遷延恐亦不免經臣訪知姓名及由犯供指出者均隨時開單勒挈一面密查蹤跡設法暗擒如另摺

奏獲之金混秋沈振達張時重張汝儒等皆倡亂主謀之首惡此外隨同糾眾奪犯抗官焚署劫獄搜殺回民各從犯或由明挈或由暗擒續經報獲解訊者並無虛日截至三月底止共解到三百二十九名除金混秋一犯情節較繁已另

具專摺

奏辦外所有前後獲犯均經

臣

督同雲南迤西道

王發越暨各委員隔別研訊緣沈振達張時重
卽張重張汶儒萬鐸趙育張汶健周曰庠劉書
均係永昌保山府縣兩學已革文武生其餘人
犯俱保山縣民人沈振達原係王姓因父母俱
故往依妻家度日經伊妻伯沈聚成收爲義子
改從沈姓與張時重等分住金雞板橋等邨周
曰庠劉書因與回民雜處恐被欺凌邀約城鄉

多人燒香結拜有事相助周曰庠劉書各爲鄉首道光二十七年七月回民丁燦庭杜文秀等以香匪串謀滅殺無辜等情先後赴京具控奉旨發交臣等親提嚴訊當經飭提人證去後旋據迤西道王發越督飭永昌府保山縣將被告周曰庠等提獲擬於十一月二十九日解省審訊周曰庠思及沈聚成亦係被控有名因充金雞卹練頭此次未聞同解想係該卹眾人爲之庇護卽密令其子周際岐等向沈聚成求救沈聚成

亦恐被解先已躲避外出沈振達遂與張時重
張汶儒等商謀阻解並以伊義父拜從爲師之
金混秋素有符呪法術可以倚恃適住睡佛寺
內沈振達卽往該寺以前情央其卜卦金混秋
起意乘此煽惑歛錢遂用竹片火炭打卦稱爲
上吉可以攔阻不必解省沈振達聲言如果官
府要解只得拚出大鬧一場稔知劉一鳴素諳
製造槍礮又因伊住處僻靜卽許給銀兩囑其
製造劉一鳴應允前往陸續購買廢鐵密雇匠

人在家私造鳥機鳥槍各十餘件交沈振達收
藏維時沈振達金混秋密相往來經該府縣訪
聞驅逐金混秋出境沈振達私遣萬鐸趙育傳
贊等將金混秋接至金雞邨同住商用各種邪
術並與張時重張汶儒等商允於人證起解時
聚眾在途打奪先寫傳帖分赴各哨糾約猶恐
人心不齊倡言如有一人不到將來定行殺害
此沈振達倚恃金混秋邪術倡謀糾眾打奪犯
證之緣由也十一月二十九日府縣會營撥兵

將周曰庠等九名作爲頭起解省沈振達等探知卽令各哨傳人向金混秋領取緊皮藥分往各處攔截約吹牛角爲號齊出打奪是日午後文武官弁兵練押解人證行至官坡地方張汶儒率領眾人上前將周曰庠奪回外委胡恩榮攔阻被哨匪劉加和等施放鳥槍轟傷左臂並傷營兵丁其榮等四名各官乘轎悉被打毀兵練因眾寡不敵所有隨帶器械馬匹衣服銀物俱被搶走張汶儒等歸向沈振達張時重告述

前情沈振達聲稱此事都因回民京控所致氣忿莫遏起意糾人次日入城搜殺回民洩忿又因監內禁有哨民可以乘勢劫放大家應允約會南門外人李懶雇覓附城匪徒與各哨眾人會齊於十二月初一日早進城仍先向金混秋領取緊皮藥因人多不敷分給亦有未經領取之人其時文武已閉城門防範匪犯孟洙等潛於城缺處竄走進內眾人亦蜂擁而進扭開鎖鑰披髮持刀同聲喊殺迤西道王發越出外彈

壓匪徒恃眾不服持刀向戳家丁王貴蓋升救
護俱被戳死回民見勢兇湧多有趨入縣署躲
避者哨民迫趕殺斃多命聞有回民持刀格鬪
哨民施放鳥槍以致焚燬署內頭二堂等處監
門亦被砍開監犯逃出禁卒張五攔阻當被殺
斃內有回犯一名亦被殺害該縣出署彈壓正
值風大火烈縣署全被延燒有藏匿空屋之大
小回婦俱經燒斃匪徒乘機搶掠銀物並分往
各處搜殺回民致將在府應試之騰越回童亦

被殺害多命此沈振達等打奪犯證之後復遣
眾進城劫獄焚署搜殺回民之情形也是時各
哨人情洶洶恐有官兵前來剿捕又慮外面聞
信報復該犯沈振達張時重張汶儒等均以瀾
滄江有險可恃卽分派張成得等糾集多人前
往各隘口拒守并拆去江橋板片以阻行人且
因城中紳士不肯幫助議禁各哨不准柴米進
城又恐城內各官暗用文牘到省請兵令拒守
各隘之人遇有公文攔截拆看適該鎮道將哨

匪肆行不法請兵剿辦緣由繕稟專差赴省行至江橋被該匪等搜獲送交沈振達拆看沈振達卽將原稟抽出燒燬另捏回匪搶殺放火焚燒縣署監犯乘閒逸出各誑情挪改日期繕就假稟仍裝入原來印封遞省希圖嫁禍於回激動官兵剿辦且聽從金混秋調遣陰兵之言建臺惑眾並造壓勝妖術用蠟捻成各種獸形夤夜埋於大路此又沈振達等商同抗拒官兵奸謀詭秘種種不法之原委也當該匪等滋事之

際人眾勢兇公正紳耆率皆畏禍引避迨聞省
中調集兵練人數正多又見臣與撫臣會銜出
示諭令縛獻匪類方免悉數殲除並聞兵過彌
渡地方剽殺匪徒殆盡各匪心生畏懼紳耆卽
乘機開導商同各甲長遵示獻犯求免玉石俱
焚先將橋板鋪平通行文報尋回逃逸監犯繳
還被搶軍裝凡指名勒索之人無不陸續緝送
其民間私藏槍礮刀械由地方官督令各甲長
搜查收繳計獲三千餘件之多迨臣親到永昌

查看情形因金雞邨有哨牆一道堅固異常外
挖深濠內開礮眼雖據稱因懼眾回滋擾藉爲
防守之資然該處頑梗成風豈宜更任深溝固
壘當卽派遣弁兵嚴押該邨民人立時拆毀卽
將哨牆土石填塞溝濠費數日之功始經毀平
填滿此又該處民人畏懼軍威輸誠悔罪一切
避示辦理求免剿洗之實情也查此次滋事人
犯多卽二十五年以來漢回構釁案內之人其
被回民京控有名者已獲過半如張汶儒張時

重等均在所控之內沈振達本無控案僅因其
義父沈聚成被控應解並周日庠遣其子求救
遂起意奪犯抗官恐主謀滋事情形尙有不實
不盡旋獲到沈聚成訊明伊聞傳解之信已去
各處躲避實不知沈振達如何起意糾眾滋事
質之張汶儒張時重等則均稱實與沈振達同
謀並未尋見沈聚成商議且沈聚成素不識字
自不能寫帖傳人沈振達亦堅供因沈聚成躲
避之後恐官府著伊找尋是以同謀阻解又知

金混秋與沈聚成誼切師徒必能用其方術始
終保護經金混秋妖言聳動深信不疑以致鬧
成大禍懊悔無及並究出沈聚成之妾沈李氏
亦拜從金混秋爲師傅習符呪方藥與另獲爲
徒之何萬選等先後到案質審無異又據委員
訪有匪徒捏稱京控提人係各官假傳

聖旨編造歌謠寫成匿名揭帖刊刻板片之李名揚
一併獲案訊認屬實當於該犯家中起獲歌謠
板片當堂令其默寫字句相符至製造槍礮則

訊係劉一鳴施放鳥機中傷弁兵則係劉加和
并未獲之劉汶倫劉老六傳帖糾人則係萬鐸
趙育張重五等帶眾進城則係李闊張重六丁
濟溥傅有學萬儀張密等劫獄放囚則係邵得
興王老七宋發春蘭得沛等搜殺回民并嚇截
官長殺斃家丁則係楊得白超鵬等並追訊二
十五年九月初二日帶練入城慘殺回民多命
則係馬老五樊晉得白沾淋蔣潮富王均楊茂
張炳等其餘聽糾劫犯並在官坡與縣署等處

乘機搶奪銀錢衣物放火焚燒回寺砍殺回童
以及遞送傳帖拒守江橋拆斷板片截毀公文
阻攔柴米進城各從犯俱各供吐實情歷歷如
繪彼此互質眾供相符案無遁飾此案沈振達
妄信妖言起意糾眾奪犯抗官私造槍礮並劫
放罪囚謀殺回民種種不法實屬首惡張汶儒
張時重厥罪惟均俱照謀叛律擬斬立決從重
加凌遲處死萬鐸趙育李悃張重五黃疤眼姬
小六李七蠻劉汶華張成得李得春連其秀楊

蘭楊秀凡趙五蠻陳淋張老四宋五十八姜炳
王老七邵得興宋發春蘭得沛楊得白超鵬二
十四犯或接引邪匪聽信妖言同謀轉糾奪犯
或劫放獄囚焚燒衙署乘機搶奪殺斃回民一
二命並拆斷江橋截毀公文打毀官轎嚇截官
長實屬同惡相濟均照謀叛斬立決律擬斬立
決從重梟示案係比照問擬應免緣坐馬老五
樊晉得白占淋蔣潮富王均楊茂張炳宋黑老
蠻八犯除聽糾奪犯輕罪不議外究出二十五

年九月殺斃回民多命聶以青聶小卷挾仇謀
殺後支解屍身趙三蠻搶奪得贓逾貫又殺斃
回民二命均照例擬斬立決梟示查明該犯等
財產按例核辦黃兆沅王十蠻晏三袁二蠻李
沛谷潤之孟洙蘇秉虔林向春段幅王立得姚
小二聶以至聶以莊安七蠻董盈魁傅發蹇位
石秉蠻王洪張四牛黃楊長子楊春富李丕顯
張汶健楊發洪楊本潔張汶佑楊三趙受沅董
潮湘張重六丁濟溥傅有學萬儀張密劉一鳴

趙洙高六十七楊得洪劉安章張貞沅姬汶昭
姬小九徐定蠻趙玉珍王小五王接蠻王有發
王受倡劉加和周上智五十二犯實係聽從轉
糾奪犯施放火器中傷官弁搶奪軍械造意殺
斃回民一二命並劫囚在場助勢放火焚燒公
廨殺斃家丁差役及燒香結盟等事均應照謀
叛已行律擬斬立決劉一鳴製造槍礮至十數
件之多照例處斬與施放鳥機轟傷官弁之劉
加和俱斬立決李名揚一犯捏造悖謬言詞刊

刻板片投貼匿名揭帖應照例擬絞立決以上各犯情節較重未便久稽顯戮臣於審明後卽

恭請

王命飭委迤西道王發越新嘗營遊擊恆權將該犯等綁赴市曹分別處決馬老五王均李丕顯張密四犯俱已在監病故馬老五王均殺斃多命照例戮屍應梟示者傳首犯事地方懸竿示眾以昭炯戒周曰庠劉書倡立香會結拜弟兄聚眾至二十人以上各自爲首自應各科各罪周

曰庠劉書二犯均擬絞立決惟該犯係回民丁
燦庭等京控首列之犯應俟提齊原告人證質
訊明確再行處決楊寬張小五晏幅蠻宋潮青
范老蠻楊開蠻王有洪趙草果田健九犯聽從
謀殺回民傷而未死俱照謀殺人從而加功絞
監候律擬絞監候秋後處決沈聚成沈李氏三
帕坎望老周何萬選各自拜從金混秋爲師傅
授邪術方藥卽屬爲從照例改發回城給大小
伯克及力能管束之回子爲奴沈聚成在監病

故應毋庸議沈李氏係屬婦女案關邪術惑眾
應不准其取贖崔科楊浩等三十八犯聽糾打
奪人證並進城乘機搶奪財物又楊湘陳啓等
二十六犯身充鄉約卽係在官人役乃敢聽從
匪人遞送傳帖攔阻柴米實屬戩法均應照謀
叛爲從斬罪上減一等改發新疆給官兵爲奴
劉加美王禮等七十三犯聽從奪犯搶得財物
應照聚眾打奪人犯因而傷差者爲從杖一百
流三千里律應與放火故燒空房斬罪上減一

等之徐連生俱擬杖一百流三千里楊春幅等
十犯係聽糾奪犯在場並未傷人應照律杖一
百徒三年周際岐吳堃二犯因其父周曰庠等
被獲解省卽向沈振達求救雖係迫於父命究
屬生事釀禍應於官司捕獲罪人聚眾中途打
奪因而傷差者爲從杖一百流三千里罪上減
一等杖一百徒三年沙作和尙老李周志五景
秀淋五犯訊止受雇服役並無拜從爲師情事
應於沈聚成遣罪減一等擬杖一百徒三年均

到配折責安置以上各犯應刺字者照例刺字
徒罪限滿詳釋楊老五等十犯訊係事後搜取
財物計贓准竊盜論應照竊盜贓一兩至一十
兩擬杖七十仍免刺字劉定沅等二十八犯訊
止被脅同行雖無不法實跡究屬不合應照不
應重律杖八十俱折責發落起獲李名揚匿名
板片案結銷燬其餘田作貢等二十九名歸於
回民京控案內議結其因變逸出自行投首監
犯趙金春等十名飭令照例辦理未獲楊學淋

一名仍嚴飭上緊緝拏受傷外委胡恩榮營兵
丁其榮等四名傷已醫痊應毋庸議被殺被燒
溺斃之回民男婦已據保山縣驗明捐棺殮埋
所有焚燒衙署及劈砍監獄已由臣等率屬捐
廉建蓋修理城牆塌缺處所飭令補修堅固呈
繳槍礮火藥器械現在派員查驗分別存貯配
用未獲各犯仍飭文武員弁督率兵役嚴緝務
獲究辦此案事起倉猝眾寡不敵文武員弁應
得處分及失察各職名可否仰懇

聖慈從寬邀免出自格外

天恩除將各犯供詞發交臬司彙核詳送撫臣咨部

備案外再查保山地方經此次懲創之後人心

震懾地方均甚安靜容再熟籌善後事宜奏請

聖裁欽遵辦理所有前調各標官兵除酌量留防外

餘已陸續檄徹歸伍合併聲明謹將獲犯審擬

緣由會同撫臣程商采提臣榮玉材恭摺具

奏伏乞

皇上聖鑒訓示謹

奏

順途校閱營伍并酌改營制摺

奏爲保山軍務將竣臣於駐劄永昌之便遵

旨校閱營伍恭摺奏祈

聖鑒事竊臣接准部咨欽奉

上諭本年輪應查閱雲南貴州等省營伍之期雲南
貴州著卽派林則徐逐一查閱認真簡校如查有
訓練不精軍實不齊者卽將廢弛之將并據實劾
參毋得視爲具文等因欽此臣查滇省向來閱伍

章程迤西之騰越鎮標暨永昌龍陵二協順雲

一營均在永昌府校閱此次臣督辦保山軍務

先由大理移駐永平節經獲犯訊供漸次就緒

永平距永昌二百里臣於三月十五日親赴郡

城沿途查看城哨情形均極安靜隨卽校閱永

昌協標官兵並調考騰越鎮龍陵協順雲營官

弁其附近之鶴麗鎮維西協永北劍川等營向

係附於提標及大理城守營操閱此次該鎮協

營官兵有調至永昌軍營者亦卽就近先行校

閱以省日後輪換赴考所有閱過隊伍陣式均

尙整齊連環排槍聲勢聯絡刀矛雜技擊刺跳
舞亦俱熟習馬步箭中靶分數不等各在六七
成以上施放擡礮擡槍烏槍亦皆猛捷有準兵
丁技藝優長者當場獎賞生疏者分別責革降
糧其將領備弁中尙無應劾之員惟永昌協右
營外委韓映斗馬步僅中一箭年力就衰應卽
斥革騰越鎮標中營外委畢玉昆亦僅中一箭
惟年力正強應降爲額外勒令學習以觀後效
又永昌協把總蘇秉甲外委宋朝貴蘇茂年力

俱壯弓馬亦皆去得惟訪聞人不可靠據該管
官揭報前來均應先予斥革再行確查究辦查
永昌民風素稱強悍故兵丁不患其軟弱而轉
患其囂凌尤防其與各哨匪類勾通致捕緝不
能得力臣於考校之餘當場嚴加訓飭以上年
冬閒匪徒滋事如果該營兵丁盡可如干城之
寄何待多調各處兵來卽如該協掣途已革各
兵現經審明分別定罪豈爾等尙不知炯戒諄
諄開導之後又嚴諭各將備再行確查如有句

結匪類之兵速卽革糧嚴辦倘尙扶同徇庇察
出定予特參又查永昌東隔瀾滄江西隔潞江
兩處江橋最關扼要此外各路隘口亦極繁多
若專恃土著之兵踞險分防恐緩急究難深恃
臣現仍留駐征兵緝拏餘匪外擬此後酌照四
川甘肅換防之例添派別營客兵擇要駐防按
年交換不使與各鄉哨漸相熟習聯爲一氣並
將該協在城額兵量撥鄰境差使俾彼此互有
牽制以杜意外之虞容與提臣榮玉材撫臣程

商采備細酌商再行會摺具

奏總期地方安謐戎衛森嚴以仰副

聖主綏靖邊疆至意所有查閱永昌一帶營伍并籌畫營制大概情形理合繕摺具

奏再臣自駐永平後督令文武緝獲糾搶財物擄

佔婦女之回匪一百餘名現將永昌案犯審畢

卽行接審回案一俟辦竣擬赴大理校閱營伍

並將回民京控兩案人證提到該處親審仍會

同撫臣覈辦如保山暨各處續有報獲匪犯亦

解大理歸案訊結合併陳明伏乞

皇上聖鑒謹

奏

甄別知府各員摺

奏爲甄別才不稱職及衰庸有疾之知府同知知

州請

旨分別降補勒休以肅吏治恭摺奏祈

聖鑒事竊臣等仰蒙

恩命畀任邊疆首以整頓吏治爲要務業經兩次

奏請甄別州縣提舉等員分別降革勒休在案嗣

復於各屬所辦公事隨時留心察看並因臣林

則徐此次親至迤西一帶督辦軍務所有永昌

順甯麗江等屬向因距省較遠未便札調前來
茲更就近訪詢並將因公接見覘其才識之長
短精力之盛衰與臣程喬采往返函商互相印
證查有現署永昌府知府李恆謙由騰越同知
拏獲永昌滋事首要回匪出力奏奉

諭旨俟升任後賞加道銜並

賞戴花翎旋奏升永昌府知府奉

旨准其升補照例送部引見等因欽此於道光二十
六年閏五月先行任事因保山漢回未靖一時

接署乏人尙未給咨送部引

見上年

臣

等到滇後雖未接見該員而查知其於嘉

慶年間卽任滇省通判海厯思茅龍陵騰越各

邊缺同知並在永昌原任內已閱年餘於邊務

尙無貽誤此次

臣

林則徐在永昌接見數次聆

其議論雖甚熟悉情形而性近優柔臨事未能

果決卽於該處地方難期整頓惟當哨匪滋事

之時尙能將公正紳耆密爲招致諭令設法散

其黨羽並雇募練勇保護城垣輿情並無不協

應請撤銷道銜降爲同知留滇候補以觀後效
又署麗江府知府龍陵同知陳釗鏗平日辦事
尙稱勤謹歷任邊缺同知兩署知府均尙裕如
惟近患目疾多日未痊視事臨民諸多不便又
鶴慶州知州姚光熹履歷雖開五十七歲察其
精力實已漸就衰頽辦公殊形竭蹶未便任其
戀棧以上二員均請勒令休致除將永昌府缺
揀員另摺請調外查實任麗江府知府嚴廷珪
自京引

見回滇不日可到現將府缺委員暫代俟嚴廷珏到
滇卽行飭令回任至龍陵廳同知係極邊要缺
容另揀員照例題調其鶴慶州知州簡缺滇省
現有應補人員應請扣留外補合併陳明所有
甄別知府同知知州請分別降補勒休緣由謹
合詞恭摺具

奏伏乞

皇上聖鑒訓示謹

奏

調補永昌知府摺

奏爲遴員調補邊要知府恭摺奏祈

聖鑒事竊照永昌府知府李恆謙才具未能勝任現

經臣等另摺甄別

奏請降補在案所遺永昌府知府係極邊要缺例

應在外題補該處接壤夷疆漢回雜處械鬪焚

搶久已相習成風且上冬哨匪抗官近日甫經

懲創此後彈壓撫綏較常時尤關緊要非嚴明

幹練之員不足以資整飭滇省雖有候補知府

二員皆於此缺未能勝任其同知直隸州各員
內人地亦多未宜殊無堪以請補請升之員臣
等與藩臬兩司逐加遴選惟查有臨安府知府
張亮基年四十歲江蘇舉人由內閣中書因出
差河南堵合祥符大工出力奉

旨加侍讀銜

賞戴花翎旋升侍讀

京察一等奉

旨記名以道府用二十六年十二月奉

旨雲南雲南府遺缺知府著張亮基補授欽此旋
奏補臨安府知府於二十七年八月二十四日到
任該員才識明幹勤奮有爲在臨安半載有餘
緝匪懲奸不遺餘力以之調補永昌府知府可
期勝任惟題缺請調與例稍有未符但人地相
需例得專摺奏請合無仰懇

天恩俯念極邊要缺

准以臨安府知府張亮基調補永昌府知府實於地
方有裨如蒙

諭允該員以知府調補知府銜缺相當毋庸送部引見所遺臨安府知府係請

旨之缺應請

簡放以重職守所有揀員調補邊要知府緣由臣等謹合詞恭摺具

奏伏乞

皇上聖鑒訓示謹

奏

擊獲歷年拒敵官兵匪犯審辦摺

奏爲歷年永順雲緬軍營剿散餘匪竄擾各屬地方現乘凱撤大兵分投捕獲多起究出戕害擄禁員弁拒殺兵丁練勇各要犯七十六名審明立置重典以清餘孽而靖邊陲恭摺奏祈

聖鑒事竊查雲南迤西一帶自道光二十五年漢回構衅節次用兵當時殲斃匪徒雖已不少而擊散之眾分股竄逃尙未搜捕淨盡此等怙惡不悛視焚殺爲故常以劫掠爲生計凡其經過之

處擄搶勒贖放火殺人無惡不作而州縣塘汛
兵役有限遇賊難以就擒迨標營聞信調兵往
追匪蹤又已他竄是逸匪卽成流賊邊隅何日
乂安此次臣親至迤西查悉此類竄擾情形並
疊據被害民人紛紛控訴若不乘此大兵雲集
極力掃除則撤兵之後其竄擾必更甚於前豈
能時常徵調故於駐扎永平督辦哨匪之際卽
在曲碕等處分兵拏獲焚殺擄劫各犯一百餘
名先經附片具

奏在案嗣訪聞該匪等被拏嚴緊又分竄蒙化廳
之大小圍埂及趙州之華藏寺祁家營等處復
派副將趙萬春李瑞署遊擊懷唐阿都司瑪克
塔春巴哈布署守備李廷楷等以凱撤歸伍爲
名帶兵馳往掩捕一面檄飭該處文武嚴密會
拏正在遣兵起程間卽接據署蒙化同知張錦
稟稱因大小圍埂一帶山深箐密每爲匪徒出
沒之區先已諳諭該處紳士頭人密探外匪來
蹤嚴杜內奸勾結並選公正能事之舉人馬綸

武生米萬選爲總甲長邀同俸滿教職傅士珍
雇募練丁梭巡偵緝適有著名回匪馬無二馬
二隴馬長興馬茶欄興米成等聞拏逃至小圍
埂附近地方正欲宰殺牛隻糾人敵血拜盟以
圖負隅抗拒卽經該署丞訪知率同馬綸米萬
選傅士珍等帶領練丁往拏詎該匪等持械拒
敵各練丁多有受傷仍上前奮力擒殺將馬二
隴馬長興馬沅張小斗四犯當時格斃擒獲馬
無二楊興馬二保馬雙淋馬揚科馬八一馬八

二龍三馬拴馬小二等犯稟解前來訊據馬無
二等同供伊與已被官兵殺斃之賊首張富大
白象貢巴巴均係同夥在永昌滋事因馬無二
氣力過人羣推爲背旗領隊二十六年三月初
六日張富要燬江橋有領兵駐守飛石口之守
備趙姓也是回子張富遣人告以汝我均係同
教親戚央他讓路趙守備大罵說我是

朝廷帶兵的官那肯與汝們叛逆認作同教我守這
裏地方豈能讓汝路過抽筋射中張富辱吻那

時官兵亦齊聲喊殺回眾死了二十餘人有頭
目羅萬喜等趕來要代張富出氣拚命抵拒殺
死官兵十餘人砍傷落水無數並將趙守備擒
到長灣趙守備罵不絕口馬無二馬茶幘興米
成姚大喜等將其支解馬無二把他心肝挖出
給張富等炒食是日遂將江橋燒斷等供案查
守備趙發元於二十六年三月在飛石口拒守
被賊戕殺核與犯供相符當卽飭據張錦等將
馬茶幘興米成一併拏獲米成於被拏時將身

帶尖刀自抹咽喉經練丁將刀奪下驗明氣味
未斷醫治解審提與馬茶輟興馬無二質對供
認同殺情形副將趙萬春等隨亦帶兵趕至該
處會同搜捕將備皆爭先奮勇擒獲多名把總
程國斌唐萬全劉煥章覃福海外委施嘉瑞柳
應祥唐肇勳姚炳額外外委劉文華余正林王
開魁暨蒙化廳經歷朱美鏐巡檢李克猷分路
兜拏各有報獲除當場格斃及訊係另案劫殺
非與官兵拒敵者核歸另摺分辦外其曾經戕

害員弁拒殺兵練之要犯計有四十二名又據

代理城守營都司韋中魁會同代理趙州俞良

傑及團練壯丁之捐升雲南按察司經歷盧廷

燮將要犯羅萬泰拏獲並將盧廷燮帶練首獲

之馬連保趙大包馬小中趙小四代等犯一同

解審俱供屢敵官兵屬實且據羅萬喜供稱伊

爲張富大頭目歷在江橋飛石口長灣枯柯河

小松寨二臺坡猛庭寨烏鴉河打仗十餘次殺

死兵練約八九十人並於二十六年三月初十

日在大力哨與白應升同砍斃戴水晶頂之武
官一人該犯砍斷其項頸及四肢並挖其心肝
挂在樹上等情旋據署遊擊陳得功拏獲白應
升到案供亦相符案查是年三月初十日在大
力哨陣亡者係署都司之守備繆志林把總趙
得和兩人今供所殺係戴水晶頂武官則是守
備繆志林無疑又據委員咨補武定州吏目謝
德瀆督帶曲硃頭人拏獲楊楷木汶隴馬阿三
等犯據楊楷供於二十五年七月二十九日在

蓮花寺打仗與馬小二夥同擄禁武官二員詢
知一係都司姓楊一係守備姓潘嗣已聽其回
營並未殺害等情復將張錦等獲解之馬小二
提與質對所供亦同卷查是年七月有都司楊
朝勳守備潘惠揚均被賊擄去業經

奏辦有案與該犯所供相符自非捏飾此係訊出
二十五六等年滋事各匪擄禁都守戕害備弁
之情形也至拒敵兵練名數以羅萬喜爲最多
緣其打仗十餘次前後合計故殺害至八九十

人此外則馬無二馬茶峒興米成楊愷所殺或
二十餘人或十餘人爲數亦多又加署遊擊陳
得功等所獲之楊茂春殺害十人署保山縣知
縣韓捧日督同巡檢顧芳所獲之楊志五殺害
五人並傷二人都司瑪克塔春等所獲之白阿
八千總陳國樑所獲之黃得濛俱殺害五人陳
得功又會同代理永平縣知縣沈保恆暨委員
捐升雲南通判沈傳經普洱府經歷陸萬鵬等
獲黑旗馬大等犯內馬大殺害三人馬老四馬

順有馬阿四各殺害四人馬萬才張幅受袁阿
十各殺害二人副將趙萬春李瑞等會同張錦
等所獲各犯內楊周馬揚保各殺害三人馬連
興馬揚科馬懶成馬恆椿張湮卜得潰各殺害
三人盧廷燮所獲之馬連保趙小四代各殺害
三人又其所獲趙大包馬小中各殺害二人謝
德瀉所獲之木文隴馬阿三各殺害三人委員
候補知縣嚴鏞所獲之木金奉殺害二人千總
施嘉祥所獲之袁名消亦殺二人餘雖只殺一

兵一練而均係亂民皆屬法無可貸至案內人
犯尙有另犯搶劫勒贖強姦擄佔各情而既經
拒敵官兵則情罪以此爲重是以臣親提各犯
審鞫究出有與官兵打仗者悉歸此案從重問
擬羅萬喜馬無二兩犯本係滋事頭目且各戕
害帶兵守備甚至將其支解挖取心肝實爲罪
大惡極應照律凌遲處死查明財產妻子照例
辦理其楊楷等犯或同擄都守或同戕守備以
及殺害兵練自一二名至二十餘名不等均屬

兇惡昭著楊愷米成馬茶欄興白應升馬小二
楊茂春楊仁沅白阿八黃得滌馬順有馬老四
班鳩馬阿四黑旗馬大趙小四代馬連保馬阿
三楊周馬老十馬小三木金奉馬揚保趙大包
馬連興馬欄成馬恆春馬萬才袁阿十張幅受
木汶隴馬揚科馬小中卜得潰袁名消張湮龍
三袁阿科土應全馬生有劉滿沅馬大弟袁耀
馬八十白潰沅閃至倫白秀春薩應圖賽倫馬
添六馬八一馬小兒楊興馬喜陳吾三馬有勳

莫老六張牙子二馬拴陳發魁丁小五朱東王
裁縫九劉三沅楊志伍楊得楊發枝保連達保
文燦米二憨楊雙林馬大保馬二保馬小腊木
汶接馬遇頭七十四犯均應比照謀叛不分首
從皆斬律從重加以梟示案條比照問擬請免
緣坐該犯等自軍營剿散之後逃竄已逾二年
未便再稽顯戮臣於審明後卽恭請

王命飭委迤西道王發越提標參將存住將該犯等
押赴市曹分別凌遲斬決馬八二張老五袁阿

十陳順保四犯在監病斃應照例戮屍與現在
正法各犯並格斃之馬二隴等俱傳首犯事地
方懸竿示眾以昭炯戒其夥同支解守備趙發
元之姚老五據現犯供稱前在雲州打仗已被
官兵擊殺雖查與

奏案相符但恐尙難盡信仍飭嚴緝務獲不任漏
網除另開犯名及罪名案由清單敬呈

御覽並另錄犯供咨部外所有拏獲歷年拒敵官兵
各逸犯分別懲辦緣由

臣謹會同撫

臣程裔采

提臣 榮玉材恭摺具

奏伏乞

皇上聖鑒再據順甯府營等處續報拏獲逸犯亦經
審有拒敵官兵情節因路遠尙未解到容俟到
時審擬另行奏結合併陳明謹

奏

拏獲疊次搶劫焚擄各匪犯懲辦摺

奏爲拏獲疊次焚掠郵寨擄劫財物擄占婦女拒
捕殺人及持械逞兇各匪犯分別情罪輕重審
明定擬恭摺奏祈

聖鑒事竊臣自本年二月閒剿辦彌渡匪徒之後卽
移駐永平督拏保山哨匪並因近年迤西幾成
盜藪欲乘兵力殲除是以附片奏

聞卽一面分兵辦理茲承准軍機大臣字寄三月二
十九日奉

上諭勞師糜餉原非善策然此次調兵較多剿平哨
匪之後如該督以爲必應乘勢掩捕方可一勞永
逸卽著會同提鎮擇其要害壓以重兵所有著名
匪類責令指名縛獻總期漢回各匪盡皆懾服盜
蹤淨絕邊圉肅清方爲不負委任等因欽此仰見
聖主又安邊境

訓示周詳俾臣得有違循彌深欽感查迤西因距省
寫遠捕務每至因循緣緝匪類藉多兵而調兵
未敢輕議匪徒無所懾畏漸至鴟張非一朝夕

之故此次哨匪滋事不得不懾以軍威仰蒙

諭旨准調重兵遂使兇頑伏法而積久肆惡亟待掃
清之處正不獨哨匪爲然誠如

聖諭若不趁此痛懲豈有時常徵調之理幸賴

德威遠播自彌渡保山軍聲疊振各屬警動異常

臣

分遣凱撤官兵會同地方官緝匪卽皆宣布示
諭以所辦但分良莠不論漢回果能速獻兇徒
照保山免其剿洗如敢逞頑抗拒照彌渡予以
殲除成法旣所共聞利害惟其自擇前次所

奏明拏獲曲硿等處匪犯一百餘名業經隨審隨辦而後來續獲者又不止一倍復經臣督同迤西道王發越暨印委各員審明分別定擬除訊有拒敵官兵情節者從重核歸另摺

奏辨外其劫殺等案人犯木有才等一百六十七名此內漢回不一分隸保山永平順甯雲州蒙化趙州鶴慶賓川劍川等廳州縣亦有由川黔前來貿易傭工久暫不等犯事本一處糾夥亦非一時茲因臣駐紮迤西就近同時拏獲人

數眾多未便各歸各起逐案分摺具

奏應卽併案彙辦仍將各犯情罪分別聲敘緣木
有才唐泳受何愷吳玉潮木老九韓立春木信
良等稔知永平之曲碛一帶地方爲永昌往來
大路每年客商販運黃絲棉花等物馱載絡繹
起意糾夥攔路搶劫道光二十七年十二月初
三日木有才糾夥二十六人各執刀槍在曲碛
地方搶得客商棉花共一百九十二馱內寶隆
號九十七馱合盛號四十馱美盛號五十五馱

又建昌號黃絲三十四馱連馬騾趕回俵分又
於是月初六日唐泳受糾夥二十七人在齊屯
地方持械搶得引鹽九十一馱內馬增祿二十
馱馬體和十三馱馬阿四二十三馱馬定成三
十五馱因馬定成與夥盜馬阿三認識給銀十
八兩續回鹽十八馱其餘趕回俵分又於初十
日吳正潮糾夥三十四人在桃園鋪分執鳥槍
刀棍搶得寶隆號棉花一百二十馱及衣物布
疋又於十三日韓立春糾夥十五人在小箐河

搶得牛十二頭馬二匹騾四匹是時各事主因連起被劫不敢再行馱運將在途之黃絲棉花截留漾濞地方寄存熊姓店內木有才等聞知貨物停運又糾夥木東興等七十九人各持刀械同赴熊姓店內派令楊小滿等五十八人在外把風接贓木有才何愷木老九馬玉標韓立春木信良楊九沅馬阿哈馬寬傑馬萬淋安正木嚨富張老七楊汶標丁自周馬富九馬阿狗馬阿七安佩木有才木東興等二十一人入室

搜劫將所獲棉花一百八十馱黃絲三十四馱
又八十四包及鹽斤布疋衣物不計其數交給
楊小滿等連馱騾一併趕至附近居住之何有
沅馬連生王稀飯趙九馬重家內寄藏因贓物
無從消賣復央與事主相熟之馬際常曾惟馨
先後勸令備銀取贖各事主共湊銀一千五百
二十兩零向其贖回尙有未贖之絲花各贓零
星變賣連前勒贖之銀每人約分數十兩及數
兩不等經地方文武訪知卽派兵役查拏因賊

眾勢兇未能逕行擒獲隨據稟請分撥弁兵陸續拏解到案并起獲贓銀九百四十餘兩提犯嚴鞫供悉前情又究出木有才於正月間在遮落哨地先後砍斃事主二命搜得銀二十餘兩又究出唐泳受本係逃徒於上年十二月間在永昌地方同未獲之楊大鑪匠等搶劫張老五鋪內食鹽一百斤並將其妻搶赴曲碕各輪姦一次後在龍街地方放火燒民房二間搶得衣服銀兩分用又究出吳正潮於上年九月間在

黃連鋪地方搶奪過路客人財物先後砍斃事
主二命又於十二月閒糾夥馬老五等在天井
鋪地方細縛事主余姓夫婦拷問搜劫併將事
主之孫媳輪姦一次又同馬老五等在打牛坪
地方抄搶事主陳老四家將其妻輪姦一次劫
得衣服同逃并將房屋放火燒燬又在雙岔河
焚燒余宗貴唐柏枝兩家房屋劫得衣物分用
又究出何愷於上年十一月糾夥馬老二等在
柏木鋪地方先後搶劫陶姓耕牛衣物及龍姓

牲畜糧食搶畢均將其房屋燒燬又在蝦蟆潭地方殺死不知姓名過客搶得銀三十兩金佛一尊計重四錢并布疋衣物復於十二月間糾同木老四等搶趙姓家銀兩并將其姪女搶來與木老四姦宿又在打鶯山強姦不知姓名婦女人一次復在秀嶺鋪梅小二家姦佔其妻將梅小二趕走此木有才等糾搶棉花鹽馱及另犯謀財害命搜劫贓物焚燒房屋輪姦婦女種種不法之情形也又蔡金隴邱八二張六斤吉

應發楊幅保忽開成蔡小狗馬源楊興濬王正
舉張庭槐歐鴻發馬奉沅張小李段甘連保蔡
惻旺張遇順張小十老僕小五三羅順李老五
羅八姚老五等先於正月十八九日在彌渡五
顯宮聽從已正法之沙玉隴糾約焚香結盟二
十日轉糾楊興濬祁二愁張庭槐祁開沅祁大
愁蔡小三楊小順黃小罄丁一信閔智楊受湮
馬有保馬路生楊小八蔣小詳馬小汶木有青
張有存等隨同沙玉隴疊赴寺坡北甲等處焚

搶邨莊鄉民紛紛逃避蔡金隴邱八二吉應發
楊幅保各執刀鏢追殺二人張小李截斃一人
并傷兩人張六斤忽開成蔡小狗馬源楊興滌
王正舉張庭槐歐鴻發馬奉沅段甘連保蔡嘔
旺張小十老張遇順李老五羅八姚老五僕小
五三羅順各殺斃一命所搶銀錢衣物多寡不
等旋聞官兵將到各先乘閒竄逃楊興滌因與
羅蕩邨居民挾有夙嫌於二月二十日三更時
糾同邱八二等前赴羅蕩邨用火藥燒著范姓

門首豆桿上瞥見邨口有人前來卽各跑回是
夜延燒空屋數間未經攫物楊興濼心猶不甘
又約邱八二等於三月初二夜復往該邨放火
共燒楊蓋趙偉等房屋十六間因居民先有準
備臨時躲開均未燒斃其家具財物多被搶奪
各犯分攜而散楊蓋等隨卽赴官控告當經分
派弁兵拏獲各犯到案訊據供認挾嫌放火搶
奪財物屬實并究出段秀等私造火藥埋藏楊
應家內當遣雲南提標守備和鑑等帶兵前往

查起因火藥埋在馬槽之下蓋以石塊兵丁用鐵鋤刨石敲出火星迸入藥餅之內藥性轟發該弁兵等躲避不及致燒斃兵丁孫占春等七名守備和鑑外委段定邦楊登科等站立稍遠亦被轟傷據該守備等具稟前來當經驗明飭醫調治照例分別卹賞此又蔡金隴聽糾結盟搶劫殺人挾嫌放火以致弁兵誤被轟傷之情形也以上各案被害之事主人等先前或因畏懼兇惡或因顧惜顏面未盡具控到官自

臣來

至逸西疊以前情控訴茲陸續拏獲首夥各犯
隨解隨審據供前情不諱犯係先後拏獲供認
情節相符案無遁飾此案木有才唐泳受何愷
吳正潮馬玉標木老九韓立春木信良楊九沅
馬阿哈馬寬灤馬萬淋安正木幗富張老七楊
汶標丁自周馬富九馬阿狗馬阿七安佩木有
白木東興二十三犯起意糾搶勒贖復搜劫焚
殺并輪姦婦女種種不法應照強盜殺人姦淫
婦女律斬立決梟示蔡金隴邱八二張六斤吉

應發楊幅保忽開成蔡小狗馬源楊興灤王正
舉張庭槐歐鴻發馬奉沅張小李段甘連保蔡
嚙旺張遇順張小十老僕小五三羅順李老五
羅八姚老五二十三犯聽糾結盟搶劫殺人并
挾嫌焚掠同惡相濟應與木有才均擬斬立決
梟示祁二憨祁開沅祁大憨蔡小三楊小順黃
小罄丁一信閔智楊受湮馬有保馬路生楊小
八蔣小詳馬小汶木有青張有存十七犯或隨
同行劫得贓或放火搶奪財物均照強盜律不

分首從擬斬立決該犯等情罪較重未便稍稽
顯戮臣於審明後卽恭請

王命飭委文武押赴市曹分別處決應臬示者傳首
犯事地方懸竿示眾以昭炯戒木有白蔡小三
張應桂在監病故木有白照例戮屍楊小滿木
愷楊沅年楊玉楊沅經土應中丁錫潰木金斗
楊洪潰楊有沅楊名寬楊俊楊汶禮楊八十一
楊占青李岡馬陽陳發申馬志富楊得周木曉
東馬義得馬四十六馬添池木老四馬青竭洪

順馬雙九馬金美安正發木根沅馬阿一許其
進木有彰馬阿七皮老六老紅馬阿黑馬六九
楊連潰木有同王懷施二馬閑馬銀阿馬萃美
馬四代馬得保小李楊阿四馬昭馬衣麼馬民
安施湮受趙吾三馬八張廷楷馬迎生楊鐵頭
段沅保張經保蔡連馨祁士淋董發有陳受六
十五犯段秀羅懶保胡二泡楊應隊私造火藥
罪止擬軍輕罪不議外均係在外把風瞭望并
未隨同入室合依強盜情有可原者改發新疆

給官兵爲奴施阿長木受淋木連玉馬五斤馬
小老馬阿五楊玉聰楊黑丁儀木三梁連升毛
老六馬老三馬占沅張丙馬成有馬沅才米發
科馬有春張從木有香馬十沅施八四木懶梁
李懶汶李春李洪馬老鷹嘴張六四陳得沅二
十九犯均照放火搶奪財物爲從情有可原者
發遣新疆給官兵爲奴何有沅馬連生馬重王
稀飯趙九五名係屬回民應照回民窩竊罪應
極邊烟瘴者改發新疆給官兵爲奴均請咨解

配應刺字者照例刺字馬際常曾惟馨雖訊無分贓情事但與賊犯說事過錢究屬不合應與被脅同行并未分贓之木玉才木先太袁有升張茂木連甲李林何正岡馬阿四馬俊黃沅有楊得沅等均照不應重律杖八十折責發落被火藥轟斃之弁兵量加卹賞轟傷者飭令醫調被擄婦女已據給親領回此案首夥各犯業經緝獲該地方文武疎防職名邀免開送現獲贓銀飭傳事主給領未獲追賠逸犯仍飭嚴緝務

獲究辦除供詞發交臬司彙核詳咨外謹將各
犯罪名案由另繕清單恭呈

御覽所有拏獲疊次焚殺搶擄各匪犯懲辦緣由會
同撫臣程喬采提臣榮玉材合詞恭摺具

奏伏乞

皇上聖鑒謹

奏

續獲保山哨匪審辦摺

奏爲續獲保山滋事餘匪一百七名究明糾人奪
犯殺回搶物及燒香結拜各情分別懲辦以紓
民憤而靖地方恭摺奏祈

聖鑒事竊臣前於四月初三日將拏獲保山滋事匪
徒三百二十九名審明定擬緣由繕摺

奏報在案伏查保山地方山深箐密路徑紛歧節
次所獲匪犯雖多而分竄潛匿者亦所必有復
經嚴飭文武員弁暨各路留防營兵毋分畛域

實力搜捕不准稍爲鬆勁茲據陸續報獲匪犯一百七名解送到臣隨飭迤西道王發越督同委員等提犯訊取確供臣復親提研審緣李同全卽蹇老蠻於道光二十七年十一月二十九日聽從已正法之沈振達傳往官坡打奪京控人證十二月初一日進城劫放罪囚並搜殺回民四命董二憨宋潮潰高發名楊二蠻張受禮高楷李如玉程汶芝萬新高滄陳發科張受均聽糾進城先後殺斃回民一命及二三命不等

並同謀聽從奪犯劫獄搶奪財物燒香結盟爲
從趙老五張介趙汶潰張小六張亞六王遇春
楊小四朱汶鮮胡雙沅張潮中張順李全曾幗
甫趙六十一段關沛李黑蠻布八兒馮海廠七
蠻胡三王小二李峙均聽糾進城殺斃回民各
一命另傷一人並聽糾奪犯燒香結盟爲從復
搶奪得贓姦汙婦女姚鐵匠陶頑李時秀萬老
五郭其才訊係聽糾進城謀殺回民從而加功
並乘機搶奪朱潮選王成甲王久長邱美各因

口角爭毆適傷致斃民人一命趙四拜從已正
法之金混秋爲師傳授符呪並供奉圖像李如
膏楊發聽從哨匪遞送傳帖斂錢聚眾張老蠻
高得潤崔禾楊八六張四聽從奪犯乘勢搶得
軍械雜物並燒燬回房趙淋李曉楊成謝凝魏
寬郭贊周郁張寬范先張贊陳全顧玉趙全李
沛宋俊李蔚葉五王信張小滿張得沛田作貢
張春楊美段蔣三李連甲張有義劉幫蘇茂蘇
秉甲楊成淋虞占朋張諒董茂萬益三楊歸生

楊能均係燒香結盟爲從之犯王三李中詳張
喬得祝二牛李滌楊發張蘭芳祝三牛皆乘哨
匪滋事各自起意藉端逞兇訛詐得贓其術平
安一犯則係姦拐回婦王發甲陶急子則係執
持兇器毆人成廢王小五一犯私造烏槍售賣
得錢其餘馬中義李汶茵邵小保馬大聰趙得
周楊縛蠻李彩訊止被脅同行並無持械傷人
情事以上各犯督令反覆研訊鞫供前情不諱
隨提前獲留禁待質之犯互相指證眾供僉同

案無遁飾查李有全董二愍宋潮潰高發名楊
二蠻張受禮高楷李如玉程汶芝萬新高滄陳
發科張受十三犯同謀劫囚及先後殺斃回民
一二命至三四命不等除燒香結盟奪犯爲從
各輕罪不議外均照謀叛斬立決律擬斬立決
加重梟示趙老五張介趙汶潰張小六張亞六
王遇春楊小四朱汶鮮胡雙沅張潮中張順李
全曾桐甫趙六十一段關沛李黑蠻布八兒馮
海廠七蠻胡三王小二李峙二十二犯聽糾進

城殺斃回民各一命並搶奪得贓均照謀叛已
行律擬斬立決該犯等情節較重未便日久稽
誅臣於審明後卽恭請

王命飭委文武押赴市曹分別處決應梟示者傳首
犯事地方懸竿示眾李有全一犯業經在監病
故照例戮屍姚鐵匠等九犯或同謀殺人從而
加功或因忿爭各斃一命均分別照律擬絞監
候秋後處決趙四一犯訊係拜從已正法之金
混秋爲師應照爲從改發回城給大小伯克及

力能管束之回子爲奴李如膏等七犯或聽從
遞送傳帖斂錢或聽糾奪犯搶得軍械各物均
照謀叛爲從減等改發新疆給官兵爲奴趙淋
李曉等三十六犯均係聽從燒香結盟應實發
雲貴兩廣極邊烟瘴充軍王三等八犯屢次生
事行兇擾害俱照例發極邊足四千里充軍衍
平安一犯合依姦拐和誘知情爲首發極邊足
四千里充軍王發甲陶急子二犯應照執持凶
器傷人例問擬近邊充軍王小五一犯應照私

造烏槍杖一百流三千里例擬杖一百流三千里以上各犯均定地請咨解配應刺字者分別刺字馬中義李汝茵邵小保馬大聰趙得周楊縛蠻李彩七名訊無不法情事惟被脅同行究屬不合均照不應重律杖八十折責發落除犯供發交臬司彙覈詳送撫臣咨部外所有續獲哨匪審明定擬緣由謹開具罪名事由清單會同撫臣程裔采恭摺具

奏伏乞

皇上聖鑒謹

奏

覆奏保山匪案並無劣員調處片

再臣承准軍機大臣字寄道光二十七年五月二十九日奉

上諭林則徐奏保山七哨懾服軍威縛獻匪犯多名仍飭兇圍嚴拏一摺覽奏均悉所辦好該地方各匪於兵到時卽先投誠獻犯惟所獻之犯有無袒庇藏匿必應徹查根究務期所獻實皆本人首犯尤關緊要應令按名交出仍一面明查暗訪斷不可有一名頂冒致有漏網該匪等聚眾抗拒已成

積習若不趁此兵威痛懲將來必仍反覆豈有時
常徵調之理現在雲貴兩省勁兵逼處不患其不
畏懼如悔罪非出至誠僅憑劣員在中調處稍示
軟弱日後何以綏靖邊圉耶林則徐等惟當示以
兵威廣加曉諭倘略有恃眾難馴情形仍當立予
剿洗姑息適足養奸戒之其前經圍困在城之鎮
道等是否因力難抵禦畏葸無能甘被圍困抑或
因事起衅辦理不善倘祇顧身家苟全性命有辱
國體亦應查明懲辦不可因事過遂置之不問現

解圍後該員等作何下落著一併確切查明據實具奏有應參處者據實嚴參以儆將來等因欽此仰見

聖主詰戎禁虺務儆將來臣跪誦再三莫名欽慄伏查此次保山滋事實由京控提人而起並非別有根由緣前年該處軍犯萬重張杰起解在途被回眾攔路截殺該哨民因而藉口將京控人證呈懇免解經鎖道批駁不准已定起解日期又惑於奸匪金混秋打卦邪言謂可不必解省

始思糾眾截回迨奪犯已成復因而遷怒回民
搜殺洩忿適回民奔赴縣署放槍追逐致將房
屋延燒種種不法事端皆臨時相因而起卽各
犯到案僉供亦不料事鬧如此之大故當其洶
洶聚集一時附和者雖有盈千累萬之多迨經
撫綏彈壓大眾亦各散歸究無圍署傷官之事
惟沈振達等係主謀首惡所住之金雞板橋等
哨附近江橋恐各官備文赴省請兵妄思截換
公文折毀橋板大兵卽可不到跡其抗違之始

原係不甘因回受戮尙無與官爲仇因懷畏罪之心轉蹈犯法之罪與蓄謀不軌情事實不相同此次既調集兩省重兵原無難立加轟洗惟該哨民聚居邨落並非有莠無良既經獻犯輸誠自未便一概剷除致與始終抗拒者無所區別此案前後獲獻各犯共有四百餘名之多間擬凌遲斬絞者計一百四十五名發遣軍流者一百八十八名卽至輕亦問徒杖現在尙飭搜拏逸匪似此執法嚴辦原期永靖地方若既

奏請調集重兵復聽劣員調處了事則堂堂出師
遣將而終於隱忍消弭當何面目臨民臣雖至
愚不敢出此軍威壯盛士卒正冀立功誠如

聖諭雲貴兩省勁兵逼處不患其不畏懼卽有劣員
亦無所用其調處况辦至百數十名死罪似與
調處者迴相懸殊所有此案情形前摺均已縷
陳諒邀

聖明洞鑒至於鎮道文武各員

臣

與撫

臣

初辦此案

之時亦疑其辦理不善迨

臣

親至保山察看情

形探訪輿論核其前後所辦尙無不合機宜查該鎮道本非駐劄永昌因派辦善後事宜始至該處所帶兵役本極有限當倉卒起事之際人多勢眾大半隨場附和仇回而非仇官若不審察情形舉動稍涉輕躁則操之太蹙城池倉庫在在難保無虞該鎮道當時親自彈壓復督令府縣及佐貳員弁分頭曉諭故脅從匪黨卽先解散其時各官在城支持防護雖不免於困而究未被圍此該鎮道等臨事鎮靜之尙合宜也

當哨匪糾眾之時城內紳耆不肯隨同滋事沈振達糾眾攔截柴米不許入城固爲挾制官長實亦挾紳士不肯附和之嫌該鎮道等察知哨民雖素桀驁而仍畏外回之兇悍此次既將回民搜殺愈恐外回聞信藉報復以擾邨莊因招致公正紳耆令其廣爲開導諭以此時須協力防回不宜城哨自分畛域致爲外匪所乘此層適中哨眾隱衷故此後柴米入城亦卽照舊惟民情尙未大定未便卽派兵圍拏致令各哨驚

疑因卽以防回爲名密調永昌以西之騰越龍陵官兵至郡旣可防守府城及潞江兩處且以備大兵到後內外夾攻故永昌以東之瀾滄江橋雖被拆毀文報不通而後路之潞江橋調到兵練駐防仍可接連騰越互爲聲援以俟大兵之至此該鎮道中閒布置之尙合宜也迨後大兵到齊哨匪聞風畏懼各思逃散該鎮道督令紳耆頭人趕緊縛獻並飭前調之騰越龍陵弁兵嚴堵後路不使潛逃故網獻之外所有著名

要犯經各路官兵搜拏到案者又加兩倍綜前後事勢而論該鎮道等實亦倍著辛勤若責以先事之未能豫防概予參黜所謂欲加之罪何患無詞惟其於倉卒遇事之時猶能竭力籌維和衷共濟俾城池倉庫諸獲安全首要各犯不致遠颺地方仍臻靖謐似與一籌莫展及輕率僨事者究有穹壤之殊設使該文武有因事起衅及甘被圍困苟全性命情事臣必當據實嚴參不值代人受過實以事由提解人證而起委

無別情而人證奉

旨飭提萬無准其免解之理是以_臣等前發告示內

云京控提人乃出自煌煌

上諭並非地方官吏擅自行提如謂提人卽是激變則每年各省京控所提不知凡幾誰敢如爾等之抗拒等語以此詰問到案人犯亦皆俯首認罪是該鎮道等並無辦理不善之處卽犯罪者亦無異詞自各路官兵到齊總兵拴住仍督率所轄之騰越弁兵查拏要犯現在事竣甫回騰

越廳城駐劄迤西道王發越迭在永昌永平等

處隨同

臣

研訊犯供分別定讞近日亦回大理

察看該鎮道均尙堪以勝任惟此後永昌一郡
表率尤須得人前因該府李恆謙性近優柔於
邊要地方難資整頓業經臣會商撫臣將其甄
別降補請以臨安府知府張亮基

奏調在案其署保山縣知縣韓捧日平時辦事尙
有條理隨同張亮基措理一切當可漸臻成效
至此次查辦保山哨匪及督令凱撤官兵乘勢

捕挈各處匪犯爲時四月有餘而軍需節之又
節不敢稍有浮費所請借用鹽課並蒙

恩允動支捐輸之銀

臣

已與撫

臣

函商擬由外設法

分年籌補歸款容查明實用若干再行妥議具
奏總期師行有效餉不虛糜以仰副

聖主訓諭諄諄至意所有欽奉

諭旨據實覆奏緣由謹附片縷陳伏乞

聖鑒謹

奏

審出前次永昌戕害備弁匪犯挖心致祭片

再臣查前次永昌用兵卷內趙發元等陣亡之

事曾經前督臣具奏欽奉

諭旨陣亡之署守備趙發元署都司繆志林把總趙
得和及陣亡受傷各備弁兵丁著一併查明咨部
照例議卹等因欽此仰見

聖主褒忠延賞激勵戎行之至意惟原奏雖曾敘及
趙發元罵賊遇害而於其借路不允發矢射中
張富脣吻竟至慘被支解挖心炒食等情當時

尙未查出致未備細

上聞茲經獲犯質訛僉供如一併察訪輿論謂二十
五六年陣亡員弁中無有過於趙發元之慘烈
者臣查該故備本係回人而能深知大義敵愾
捐軀不肯稍徇同教尤爲難得彼時被賊挖心
炒食凡在行閒者聞之皆恨不得擒此下手之
賊而食其肉今旣挈獲馬無二供認下手挖取
趙發元心肝而羅萬喜亦供認將繆志林挖心
支解又獲到同時賊夥供指相符臣審明後卽

將該二犯凌遲處死并在法場之側寫立趙發元等靈牌於該二犯處決後挖心致祭以慰忠魂其行刑之弁兵與觀看之軍民咸謂

國法大伸人心盡快

臣

并摘敘辦理案由傳示各

回寨咸使聞知以見漢回一視且冀其追慕忠良潛消澆悍於風俗或可有裨除飭司查明應行議卹之員弁兵丁速卽一體詳咨辦理外合
併附片具

奏伏乞

聖鑒謹

奏

審明丁燦庭等兩次京控摺

奏爲遵

旨審明保山回民兩起京控分別情節虛實及先後
案擬辦理各緣由恭摺奏祈

聖鑒事竊_臣等上年承准軍機大臣字寄道光二十
七年七月初二日奉

上諭本日據都察院奏雲南回民丁燦庭等控告鄉
匪串謀滅殺無辜一摺已明降諭旨交林則徐等
審辦矣此案控關奸匪挾仇尋衅串謀倡亂被害

至一萬餘命之多如果屬實必須徹底根究水落石出庶足以服難民之心而除地方之害林則徐程喬采甫經到任無所用其回護著卽平心研鞠毋枉毋縱務將棍徒會匪嚴行查禁首惡各犯從重懲辦以紓積忿而快人心等因欽此當經臣等將到滇以來訪查漢回構衅互相焚殺各實情於七月內先行附片具奏奉

硃批認真秉公辦理敕靖邊圍爲要欽此旋於十月內准到部文奉

旨此案著交林則徐程喬采親提人證卷宗秉公嚴
訊確情按律定擬具奏原告回民丁燦庭木文科
該部照例解往備質欽此十一月內又准部文奉
旨此次復據雲南回民杜文秀等控告匪棍劉書等
挾嫌藉端誣控從逆致被殺搶掠迫招撫回籍
後又被殺害多名等情著仍交林則徐等親提人
證卷宗秉公嚴訊按律定擬具奏原告杜文秀劉
義該部照例解往備質等因欽此并准將各原告
連鈔錄呈詞咨解到滇臣等遵卽會同核明兩

呈所控之人除相同者不重計外合共指控二百七名查保山距省十九站人數太多勢難盡解當經札飭該道府分別首要次要酌量行提一面檄司委員往解詎該處七哨漢民頑梗成風始則欲將應解人證抗匿不解繼則竟將起解之人聚眾劫回並入城搜殺招復回民劫放獄囚焚燒縣署且折毀江橋板片截換來往公文種種不法必須大加懲創經_臣等

奏調滇黔兩省官兵分布進剿_臣林則徐於本年

正月親赴迤西駐劄督辦嗣該哨民等懾服軍威自行縛獻匪犯并經委員弁兵分投查拏其計前後獲犯四百三十餘名均已陸續審明分別凌遲斬絞遣軍流徒等罪名兩次會摺奏

聞在案查上年滋事抗官之犯本卽歷屆挾仇構衅之人茲將京控名單與已辦人犯姓名互相校對內已凌遲者張時卽張時重張汶儒二名斬梟者劉汶華張炳張重五高滄陳發科宋湖潰宋發春李汝玉卽李如玉李幗王均卽王君程

文芝蘭得沛黃保卽黃疤眼十三名斬決者張
界張汶健張汶佑楊小泗李全王遇春馮海廠
七蠻周尙志胡三林向春卽林抄羅十一名絞
決者劉書周曰庠李名揚三名絞監候者趙草
果邱美二名其遣犯除已故之張傑萬重外現
所改發者沈聚成董俊段之有三名擬軍者周
郁張寬張贊張小滿張友義楊能楊成楊歸生
李沛李連甲范先趙林趙全萬益三郭贊田作
貢段蔣三宋俊顧玉李曉魏寬王信陳東蘇秉

甲術大卽術平安謝凝二十六名擬流者王全
董玉淋白上材三名擬徒者楊春富周際岐吳
堃三名統計京控單內已經辦罪者六十六名
除凌遲斬梟斬決各犯不便稽誅已於未審京
控之先業經處決外其絞決之劉書周曰庠二
犯前摺內聲明俟提同原告質訊後再行處決
其餘定擬監候及遣軍以下人犯經臣林則徐
折回大理提到原告丁燦廷親寫遵斷甘結四
人共印手摹送呈備案惟查核原呈情節有實

有虛或架聳其詞或掩飾其罪均所不免適迤
西軍務已竣臣林則徐應返省垣當將原告四
名並續獲被控之黃潰等仍帶回省遵奉

諭旨會同

臣

程喬采復提人證卷宗督同在省司道

逐加研訊緣丁燦廷木文科杜文秀劉義均係
永昌府保山縣城內回民黃潰等係保山縣民
人向爲前署縣事嗣代理府事之候補知州恆
文服役道光二十五年四月閒有已經殲斃之
陝省回匪馬大等在保山板橋地方唱曲譏笑

漢民被逐起畔漢回互相糾眾仇殺焚掠經永昌文武帶兵往擊回匪率眾拒敵戕害大小營員及兵練多人各處漢邨回寨彼此互燒其燒斃殺斃之人事隔數年難以追查確數維時該管迤西道羅天池署鄧川州知州恆文先後奉札前往查辦回眾愈聚愈多屢有攻撲營盤之事漢民喧傳回匪起意進城要將漢人殺盡密約城內回民作爲內應並將送書之人盤獲以致九月初二日金雞板橋各哨練頭藉有官給

防匪之諭紛紛帶練進城聲稱援救遂將城內
回民無分老幼男婦混行殺戮以致同時殲斃
約有四千餘命之多因事起倉猝在城文武彈
壓不住而恆文之家丁黃潰與回民亦有仇隙
乘機執刀至杜文秀未婚妻馬小有姑之家砍
殺其父斃命將馬小有姑帶回寓處窩藏旋經
恆文押令送交保山縣轉發官媒看養該犯又
與已正法之王均楊茂張炳白占淋樊晉得等
各帶練丁名爲防變實則縱其搶殺有外出之

回民白廷贊及其兄白廷颺家被練殺害多命
并搶奪衣箱四隻旋經前督臣賀長齡飭令保
山縣追出併作三隻轉解太和縣傳主認領同
日丁燦廷木文科杜文秀劉義等家均被慘殺
多命因人眾勢亂不能指出兇手何人嗣經各
路官兵彈壓剿辦將拏獲漢犯萬林桂等分別
審擬正法漢回被燒邨寨及傷斃丁口一律撫
恤經前督臣奏結在案丁燦廷等痛念家口死
亡財物焚燬心懷不甘於回匪屢次報復之後

復商同木文科杜文秀劉義等先後赴京控訴
冀圖伸理此該原告等起意京控之緣由也其
呈控不實之處如所稱城內被殺八千餘人核
之節次奏案及府縣稟報均無如許之多然先
前尙不敢定準此次臣林則徐親到永昌查縣
署被燒之後案卷已成灰燼惟府卷均屬齊全
查有道光二十四年前任知府金澂任內據保
山縣造報編查戶口底冊當卽吊起與鎮道暨
委員公同查閱內載五城共有回民四百一十

七戶通計大小男丁一千八百八丁女口一千二百四十三口統其核算其丁口纔及三千有零卽延至二十五年一歲之間不能驟添一大半又城外各邨雖有臨時逃入城內居住者亦斷不能湊至八千餘人之多原呈被殺人數顯見不實且呈中旣云掩殺八千餘人而後尾又云被害一萬餘命是一詞之內亦自相矛盾詰問丁燦廷等又皆諉諸傳聞不能指實至於城外漢回各邨彼此互燒互殺在回民控詞但言

漢民燒殺回邨而訪之滇省紳衿則皆云被殺之漢民實比回民多至數倍現在事過已久原難燭照數計而總之爲挾仇互鬪之案除九月初二日城內慘殺之外概不能專罪一邊也又原呈將回匪燒搶枯柯河并戕傷兵弁之事移在九月初二以後謂因被漢民慘殺不得已而復仇又謂鄉練飾以號衣鄉首假以頂戴官私莫分以致誤戕兵弁等語查彼時回匪自二十五年七月間卽聚於猛庭寨進攻思母車燒枯

柯河及陶家寨大田街又攻丙麻其戕殺營員
擄禁都守皆係九月初二以前之事而呈內挪
前作後尤見瞞情掩飾又所控聚眾燒香一節
除指名爲首之劉書周曰庠二名均係得實已
於質對後卽行絞決外餘則有實有虛且當堂
將所控之人提與各原告質對多不相識並有
其人早已亡故及出外多年者亦皆混列在內
詰其憑何列控則稱係輾轉據拾成單實非有
心誣指又控稱文式官員視回如仇放匪掩殺

縱丁搶擄等情查前數年回匪猖獗抗官不得
已調兵勦辦其地方文武不能彈壓之咎原所
難辭若因莠民互相殘殺而遂加各官以袒助
之名甚且指爲串謀滅教則前後數年中永順
緬雲等處漢邨被回眾焚殺擄劫者何可勝計
亦皆責官員以助回殺漢之偏袒斷獄者又將
何所適從至被難之家性命且不能自保何論
財物然事後如果可以著追亦未嘗不爲查起
所有白廷贊及伊兄白廷颺家衣物除已向黃

潰迫回籍三隻外即使尚有餘賊或焚或搶亦早已化爲烏有無從追回並非地方官有縱匪匿贓情事又據控稱招撫難回百餘名解往大理半途被殺三十六名一節卷查二十六年五月安插回民行至右甸途遇鄉團沖散致被追殺三人其漢團亦被回民殺斃一人嗣飭附近地方官招徠仍送至大理安置所控固有其事尙無殺死三十餘人之多又據控稱二十六年十二月間永昌收租回民被殺七人茲查案據

實止六人內袁潮富木二蠻二名係被王缺嘴
挾嫌商同楊椿富等在花橋謀殺犯已全獲將
王缺嘴楊椿富問擬斬絞招審病故鄭三蠻張
老七張發沅擬流又楊根大馬潰二名係被張
汶健糾同樊晉得卽樊么大白占淋卽白滿大
等砍死攫取銀物已獲張汶健樊晉得白占淋
均擬斬決白上才擬流張汶申擬徒續獲張汶
卓現飭審辦又木汶舉袁援二名因下鄉收租
被趙潤與不識姓名數人搶奪銀物戳傷身死

二參犯未弋獲業經開參在案又原呈牽控猛
庭回民於二十六年十二月被右甸團匪殺害
一節雖非該原告等切已之事而大致尙非虛
捏查此案上年拏獲首犯范小黑及張小沅經
臣等會審

奏明斬梟在案近日續獲嚴萃容孫幅沅馬中驥
輝潰登四犯各供認在猛庭殺死馬應瑞等各
一命又獲李九舟李廷玉二犯供認各殺死練
勇回民二命均經彙核辦理此又臣等研訊原

告情節分別虛實不敢稍有偏抑之實情也總之數年來永昌之案漢回各有曲直漢人之逞忿於回者莫甚於二十五年九月初二日之事而回人之逞忿於漢者前後併計實亦厥罪惟均此次將哨匪辦至四百餘名回民皆已心服而回匪之流毒各處先前拒敵官兵近時劫殺商旅擄掠婦女者亦經挈獲懲辦不但漢民心服卽各處回教中之良民亦謂匪類既除伊等免累咸知感激是此番但分良莠不論漢回之

辦法似有明效大驗至保山哨民餘匪臣等仍隨時飭拏又經續解馮得勝陳登萬及京控有名之已革文生石維沂三名內馮得勝供認聽糾進城乘機搶奪石維沂陳登萬均認燒香爲從亦應一併按例擬結查黃潰一犯身充長隨膽敢附和哨匪刃斃人命復將婦女擄藏又縱練四出搶殺應比照謀叛斬立決律擬斬立決加重梟示臣等於審明後卽恭請

王命會委臬司營將等將該犯綁赴市曹處斬傳首

犯事地方以示炯戒案係比照問擬家屬免其
緣坐李九舟李廷玉二犯在猛庭各斃練勇回
民二命亦應斬梟嚴萃容孫幅沅馬中驥輝潰
登四犯各殺回民一命均應斬決輝潰登解至
途次病已沈重適臣林則徐審決另案重犯卽
將其先行正法以免倖逃顯戮馬中驥於解省
後病故應毋庸議李九舟李廷玉嚴萃容孫幅
沅四犯經迤西道王發越審明定擬具詳均因
患病尙未起解當卽咨明提臣會同該道恭請

王命卽將各犯在大理就地正法免致稽誅馮得勝
乘機進城搶奪財物應照謀叛爲從斬罪上減
一等改發新疆給官兵爲奴石維沂陳登萬二
犯聽從燒香結盟應照例實發極邊煙瘴充軍
原告丁燦廷木交科杜文秀劉義京控呈詞均
有失實之處本應照申訴不實律定擬姑念伊
家均已被害情殊可憫應請從寬免責釋放再
黃潰一犯係勒休知州恆文之家人該犯挾仇
妄殺並縱令練丁滋事卽使恆文並未縱容亦

屬昏贖不職且該員係與已革道員羅天池同
辦此案羅天池業經奉

旨革職永不敘用該員事同一律僅予勒令休致尙
覺不足蔽辜相應請

旨將勒休知州恆文一併革職永不敘用以示懲儆
黃潰所擄之馬小有姑訊明未被姦污已據杜
文秀具結願領完娶應毋庸議此案京控單開
香匪姓名除查明業已物故及早經外出并不
在籍者均毋庸傳提以免拖累外其提到被控

人犯供認燒香爲匪者均已分別定罪卽屢訊
堅供並無燒香者亦經提同該原告丁燦庭等
再三質審據供素不認識并不能指出爲匪確
據不敢誣執自應分別釋回本籍管束至其控
呈之外有實曾戕殺回民而該原告轉未控者
亦先後併獲多人俱訊明正法統歸入哨匪案
內錄供報部已咨者毋庸重錄外再有現在續
辦斬絞遣軍之黃潰等十二名犯俱暨原告丁
燦庭等供結一併鈔錄咨部備核經此着持平

懲辦之後漢回人等尤當隨時化導約束令其
盡消仇衅永作良民以期仰副

聖主敕靖邊圉之至意謹將會訊辦理緣由合詞恭
摺具

奏伏乞

皇上聖鑒謹

奏